

中國方志叢書·華北地方·第四一四號


據

清·王克昌修，殷夢高纂
清康熙四十九年鉛印本

影印

山西省

保德州志



成文出版社有限公司印行



10094135

中國方志叢書·華北地方·第四一四號

據


清·王克昌修，殷夢高纂
清康熙四十九年鉛印本

影印

山西省

保德州志

成文出版社有限公司印行



10094134

中華民國六十五年 月壹一版

保德州志

全二冊

發行人：黃 成 助

出版者：成文出版社有限公司

台北市郵政信箱二二六〇五號
台北市羅斯福路三段二四〇巷五號

印刷者：成文出版社有限公司

內政部登記證內版台業字第一一四七號

續印保德縣志書序

保德雖處偏隅向稱名都而近年商務衰敗教育落後余竊念
蒞保平匪之餘進行政治方疑文化之缺及閱縣志其敘述精
詳筆墨簡潔而後知此邦人士不乏通儒班馬體裁無忝於著
作之林矣乃存書遍尋祇得兩部爰擬續印分送各學校及各
機關人員共資閱覽於政治教育上獲壤流之助乃詢諸士紳
僉謂版存文廟棄而不用者三十餘年現已失毀不完余甚惜
焉因思鉛印方便較補舊版費省遂邀請士紳逐卷校正籌款
續印俾免失傳查保德縣志已修六次當此財政困難之秋縱
不能繼續纂修媲美前賢而續印多部以供稽古者之參考較

諸僅存一二部裨益文化實多矣爰弁數言以誌顛末中華民國二十一年九月九日保德縣長馬蕃庶序於縣府觀河樓

志序

保德地鄰邊塞去河套密邇城廓處萬山中黃河則環遶其下土瘠民貧昔定義軍地也余於癸巳之春仲承乏茲土下車後即索州志讀之欲以明山川之塞阨風俗之轉移戶口之多寡賦役之重輕庶藉因地制宜乘時興革裨益新政不意僅得洵陽胡公舊志數本半屬殘闕敗壞文獻無徵屈指斷而未續自故明萬曆年間迄今蓋百有餘載矣遂不禁慨然曰州志何等事也乃可任其殘缺不一爲纂輯哉旣而紳士中有進而告余者云是志前任渤海王公業已肩荷於庚寅歲曾與錫山殷子重加增訂已付梓人惟緣資斧罔繼事

梨尚質晉陽夫王公既力任纂修於前余安可不將順勸
於後遂於次年春捐俸贖之及反覆詳覽見其因革形勝風
土田賦聖澤官師選舉人物附紀藝文莫不條分縷晰瞭若
指掌噫王公真不朽矣後之人覽此而考鑒得失觀感興起
胥於州志一書是賴其爲裨益政事不幾多乎因爰筆而爲
之序

時

康熙五十三年歲次甲午仲春中浣之八日奉直大夫知保
德州事於越馮國泰謹書於退思堂

今修州志前序

古者列國皆有史官掌記時事蓋以備觀省而垂鑒戒猶夫天子巡狩而諸侯陳詩之意云爾今之郡縣與古列國等也列國未嘗廢史而郡縣獨可無志乎顧志之與史有同者有不同者其不同者史於天下之事無不載而志止及於一郡一邑史所記者一朝之興故而志自開闢至今事蹟係其地者例俱得書此其不同之大略也其同者史紀天文地理平準河渠而志亦紀建置星野田賦風俗史載本紀世家列傳儒林技術而志亦載官師人物藝文此又其所同之大略也余少歷覽前史見陳壽之志三國魏收之撰魏書皆以愛憎

爲褒貶德怨爲毀譽心竊鄙之私慕司馬溫公之通鑑考亭
夫子之綱目時時把玩擬他日得握槩珥筆出入承明左右
天子且將彷彿其義例成一家言而筮仕以後鞅掌簿書此志
不遂四十四年夏承乏定羌莅任後即索州志觀之僅得萬
曆間洵陽胡公舊本以後別無重修者蓋一州文獻之缺且
百有餘年矣余念志與史類也雖體有隆殺事有大小而要
之信今傳後勸善懲惡其道無不合者即欲銳志纂輯以聊
見平日所好尚而羌郡凋敝實甚余方新政且剔釐興革生
聚教訓之不暇遂令此志又忽忽五六年矣去年秋

天子修一統志部檄徵天下郡國圖進呈今春余歷俸將滿復

念少時所願既限於職守而不得伸近日之情又隔於事勢而不終遂不幾大負平生之志且無以稱明詔揚盛業哉因再覓得郡貢士白君藍生所輯本屬錫山殷新又先生重加增訂而余於政事之暇總其大綱相與商略不逾時而書告成繁雜者芟闕略者補筆削皆從其實是非不詭於正庶幾乎信今傳後勸善懲惡於一州之文獻少有補已嗟乎士君子讀書稽古雅志著述上之得以備顧問侍起居歌頌聖德潤色鴻猷至於文列琬琰筆垂金石固其幸矣不然而口誅筆伐顯微闡幽進退百王上下今古勒成一書藏之名山傳之其人亦其次也若乃區區百里之掌故一方之記載而爲

之撰次點竄徒令盲左腐史笑人寂寂曾何足爲作者道然
以郡邑之稗乘上繼南董之簡策於以備觀省而垂鑒戒亦
豈等諸帖括章句之類徒供覆瓿之用已哉讀是書者慎勿
但視爲淹雅之資遺忘之助而用以考鏡得失切已體察則
於學問政事皆有所益而亦不辜纂輯者之苦心也乎是爲
序

崑

康熙四十九年歲次庚寅清明後八日

賜進士第奉直大夫知保德州事東海王克昌瀚澠父自序

今修州志後序

我

皇上臨御垂五十年聖德神功覃及無外冰天桂海之區沐日浴月之境莫不奉冠帶朝正朔四十有八年暨秋諸詞臣修一統輿地志將成我

皇上考圖數貢隸屬籍者逾萬國焉爰命四海外內悉繪其山川險易道里遠近以獻九月中部檄下保德時郡守東海王公蒞任閱五年矣憫舊志不修百有餘載文殘獻闕久有纂輯之志緣州政之廢弛者多夙夜淬勵不遑他務部檄至公乃憮然歎曰是役也吾不可以復緩遂竭力蒐羅

自萬曆季至今除星野輿圖山川土物外餘凡城垣廨舍
學校倉庫郵亭井里廟壇寺宇之興廢兵刑錢穀禮樂制
度朝政民俗之沿改官吏師儒忠臣孝子義夫節婦之實
蹟以及古今事變斷簡殘編其可以備掌故廣見聞者靡
不裒集又得郡貢士白君藍生所輯本與洵陽胡公應志
互相參考至四十九年春公俸滿將內陞余時在公署中
公即以胡志及白君本與所裒集諸條授余編纂且復語
余曰今

天子聲教四訖部檄來徵郡圖爲人臣子固宜推廣

上意黼黻呈獻之萬一況吾少好司馬遷班固之文章長復

雅慕流水紫陽之書冀得簪筆玉堂左右起居共勲昭代
信史而今既不可得區區一郡之志藏諸中已半紀而今
復有志不就是使此州百年之文獻終於殘闕且若

天子之明命何先生尙佐我所不暇勿憚煩瑣爲余以不能筆
削固辭公再三敦諭余不獲已承命纂修復廣爲稽考增
其闕略訂其訛舛公退食之暇時時與余相質正大約事
取其真辭尙其核予奪衷諸輿論是非本諸公心期以徵
往示來信今傳後閱兩月而役告竣總爲志十類八十八
條以白君所輯爲藍本而余所增訂居十之三四志成公
序其首而余亦以卮言附其後余惟志者誌也欲人誌之

於心以開其志也閱是志者覽因革則宜思古今何以勝
衰而有鞏固苞桑之志覽形勝則宜思河山何以帶礪而
有綢繆陰雨之志覽風土田賦則宜有志於教養而思民
行之何以興民生之何以奠覽聖澤則宜有志於忠貞而
思君恩之何以報臣職之何以稱覽官師選舉能不思賢
否善惡前鑒昭然而志於法戒之當慎乎覽人物能不思
忠孝節廉芳型未達而志於興起之當急乎若乃覽附紀
而思武備則效命疆場之志不可忘也覽藝文而思文事
助經諱天地之志不可無也倘閱者誠能本我之志以觀
志之所志又能即志之所志以立我之志則此志之一卷

一帙皆有裨於朝廷之風教雖其鋪張揚厲或不及應邵之風俗通顏古之王會圖而用以輔佐聖神之功化倘不無涓埃之益乎是則公心之所厚期而亦余志之所深望也夫

皆

康熙肆拾有玖年龍集庚寅 月望前一日錫山殷夢高新
又氏序

